



*Minggu, 02 Mei 2021*

**Ogen: HEBER 12:11**



**Pengajaren Si Mpegeluhken**



**N**ggeluh selaku kalak Kristen desken ngikuti sada perlumban. Perlumban guna ndatken kegeluhen si rasa lalap si la erkeri-kerin eme garis pendungina. Sinuratken kitab Heber nggo ncidahken uga nini-nini kalak Israel nggo menang i bas perlumban kiniteken e. Janah gundari sangana ia ngenen ras nimai uga ulih perjuangan kinitekenta seh garis batas e.

Erjuang e labo nukah ras menahang. Sekalak atlet gelah atan ia ikut perlumban, ia arus i "gembeleng lebih keras." Tujun latihan si mberat e me gelah ia mpekeri pemeteh ras gegeh je nari nandai seh i ja nge batas kengasupenna. Sebab kai pe banci jadi bas arena perlumban e, labo ka kari si sangka ntah megegeh ka nge imbangta.

Persoalenna gundari i ja nge Tuhan, i bas perjuangenta e? Tuhan muat baginna selaku singajari kita mpersiapkan diri, pusuh ras tendi ngalaken tantangan e. Ia reh arah pasu-pasu bagepe arah kiniseran sipegancihen ku bas geluhta. Perban labo lalap si bagi ukurta keputusan silakoken Tuhan bas geluhta, mawen ceda ateta, bagi si tersurat i bas ogenta. Tapi pusuh si ceda e, ngajarkenca banta gelah paguh. Kiniseran si ibahan Tuhan labo perbahan nembeh atena, la lit sekalak guru segat atena muridna, saja banci tempa keras ajarena gelah murid e beluh ras berhasil. Bage me tantangan, perbeben ras kesusahen iijinken Tuhan bas geluhta gelahna kita enda beluh ngatakan bujur man Tuhan bas siugapana pe. La mobah kinitekenta rikutken suasana geluhta enda. Sekalak siikut i bas perlumban la banci terlolah bas keadaan, tapi tetap ipacuna bana, tadingkenna sideban e, focus ia ngayaki kemenangenna. Bage me pe kita kerina enda. Didikennta e ras Tuhan ola meneken ukurta, tapi mpegegehi kita gelah jadi pribadi si nteguh kiniteken seh ku ujung geluhta.